

Uss ei la balla tier ils acziunaris

La Andermatt-Surselva Sport SA vul 67 pertschien dallas pendicularas da Sedrun e dad Andermatt

DA HANS HUONDER / ANR

■ **La Andermatt-Surselva Sport SA – ina feglia dalla Andermatt Swiss Alps SA – vul tener egl avegnir silmeins 67 pertschien dallas pendicularas da Sedrun, respectivamein dallas pendicularas d'Andermatt. Ils proxims meins duein ils binaris persunter vegnir tschentai.** Sco quei ch'ils representants dils partenaris principals han communicau il mardis da mezdi sil Pass dall'Alpsu, ei il project madirs per decisiun. Concretamein vul quei dir: Ils acziunaris – surtut ils principals – ston decider, schebein els ein prompts da surschar lur aczias alla Andermatt-Surselva Sport SA ni sch'els ein prompts da separicipar sez a quella. La vischnaunca da Tujetsch vegn a decider prevedentamein igl empren da fenadur 2012 davart la vendita ni il brat dallas aczias. Ella tegn numnadamein 51 pertschien dallas Sedrun Pendicularas SA ed ei aschia igl acziunari principal e decisiv. Sco quei ch'il president communal *Pancrazi Berther* ha detg sin damonda dall'Agentura da novitads rumantscha, vesa el plitost la varianta da brattar las aczias per talas dalla Andermatt-Surselva Sport SA enstagl da vender ellas. Entochen la stad 2012 duein tut ils conclus davart l'incorporaziun dallas duas societads da pendiculara esser pri.

140 francs per aczia

Sco quei ch'ils partenaris dil project han medemamein communicau ei la Andermatt Swiss Alps SA che tegn la maioritad dalla Andermatt-Surselva Sport SA promta da cumprar aczias dallas duas pendicularas ni da brattar quellas encunter aczias dalla Andermatt-Surselva Sport SA. Per las aczias dallas pendicularas



Marcellino Giger, Franz Steinegger, Isidor Baumann e Samih Sawiris (da sen.) alla conferenza da pressa dil mardis da mezdi sil Pass dall'Alpsu.

FOTO H. HUONDER

ras da Sedrun vegn purschii in prezi da 140 francs. Quei ei 40 pertschien dapli ch'il prezi nominal da 100 francs. Per las aczias dallas pendicularas d'Andermatt offerescha ella il prezi nominal da 20 francs. Ei exista denton era la pusseivladad da brattar las aczias. Per ina aczia dallas pendicularas da Sedrun obtegn il possessur 15,49 aczias dalla Andermatt-Surselva Sport SA ella valeta da mintgamai 25 francs. La valeta dil brat ei pia per quater ga pli aulta che la valeta nominala. Las aczias d'Andermatt san vegnir brattadas 1:1. Ils cussegls d'administraziun dad omisdus pendicularas beneventan l'offerta. «Suprastonza communal da

Tujetsch e cussegl d'administraziun dallas pendicularas da Sedrun han acceptau unanimamein l'offerta. Nus vesin la reuniun dallas duas societads da pendiculara sut in tetg sco gronda schanza per l'entira regiun», di *Marcellino Giger*, vicepresident dil cussegl d'administraziun e geru. La Andermatt-Surselva Sport SA tegn gia diesch pertschien dallas aczias dallas pendicularas da Sedrun e 16 pertschien da quellas dallas pendicularas d'Andermatt. Satisfats dalla proposta ch'ei ussa sin meisa ei era *Samih Sawiris*: «Nua ch'igl ei ina voluntad, ei era ina via e nus havein anflau quella via. L'offerta ei fetg faira ed jeu sperel che biars ac-

ziunaris nezegien la pusseivladad da brattar las aczias.»

Investiziuns da 130 milliuns

Sin fundament dalla structura futura fussen ils acziunaris dallas pendicularas da Sedrun, respectivamein d'Andermatt dad oz, representai ella Andermatt-Surselva Sport SA cun mintgamai maximum 24,5 pertschien dallas aczias. 51 pertschien da quellas teness la Andermatt Swiss Alps SA. Igl ei previu che l'Andermatt-Surselva Sport SA disponess d'in capital d'aczias da 49 milliuns francs. Quei vul dir mintgamai 12 milliuns francs dallas duas pendicularas

25 milliuns francs dalla Andermatt Swiss Alps SA. Sco quei che *Isidor Baumann* che ha menau ils davos meins las contractivas denter ils differents partenaris di, preveda il project d'engronaziun dil territori dall'Alpsu in investiziun da rodund 130 milliuns francs: «Quella investiziun ei realistica e satisfada en ina emprema fasa als basegns dil turissem.» Senza ina reduziun dil plan oriund cun investiziuns da 210 milliuns francs, fuss ei probabel buca stau pusseivel da catar la soluziun ch'ei ussa sin meisa. Malgrad la reuniun dallas duas pendicularas sut in tetg, sto la Andermatt-Surselva Sport SA aunc reglar la finanziaziun dil project dil territori da skis dall'Alpsu. Ultra dil capital d'aczias da 25 milliuns ch'ella metta a disposiziun ed ils rodund 40 milliuns francs ch'ins spetga da confederaziun e cantuns en fuorma d'emprest sco era ina summa da siat entochen diesch milliuns francs a fond perdu, mauncan aunc rodund 60 milliuns francs per la finanziaziun dil project. «Il proxim temps vegnin nus a stuer mirar co rabitschar ensemen quels daners. Ei vegn segiramein buca ad ir senza daners jasters», di *Gérard Jenni*, delegau dalla Andermatt Swiss Alps SA. Il proxim temps vegn contrahau cun las organizaziuns digl ambient ed ulteriurs recurrents. Parallelmeins duei la planisaziun en detagl vegnir cuntinuada, inclusiv il plan d'etappaziun. Medemamein vegn ei ad esser necessari da terminar la procedura da planisaziun e da concessiun, aschia che la construcziun dils emprems indrezs sa entscheiver en rodund in onn. Tenor Samih Sawiris gioga Skistar il mument negina rolla. Ina participaziun da quei investur alla Andermatt-Surselva Sport SA seigi denton pusseivla.

■ VIAFIER

Matterhorn Gottard cun novs directurs

(anr/hh) A sia davosa seduta ha il cussegl d'administraziun dalla Viafier Matterhorn Gottard nominau treis novs commembers dalla direcziun. Cheutras han las posiziuns vacantas tier la viafier e tier la BVZ Holding saviu vegnir occupadas da niev. *Marco Tacchella* (51) daventa niev cau dil sectur dil marketing e dalla vendita. El surpren la funcziun da *Marcel Mooser* ch'ei daventaus igl atun responsabel per il post da svilup dalla fatschenta ch'ei vegniss scaffius da niev. *Martin Berchtold* (43) daventa niev cau dil menaschi. El remplazza *Peter Rüttimann* che va en pensiu. Sco niev responsabel per il sectur dil material rullont, tracziun e cumpra ha il cussegl d'administraziun tscharniu *Ivan Pfammatter* (35). El succeda a *Fernando Lehner* che ha surpriu igl atun la funcziun da directur da *Hans-Rudolf Mooser*.

■ ARTG PERSONAL

Gratulaziun a Glion: L'entschatta avrel 2012 ha *Rudolf Seeli* saviu festivar il giubileum da 20 onns ella interpresa Cavigelli inschigniers a Glion. Cordiala gratulaziun e bien engraziament per la buna lavur prestada. Nus giavischein ad el vinaron bien success e bia satisfaziun.



Ensemen fai dapli plaschair

procap Procap Grischun Tel. 081 253 07 07 www.procapgrischun.ch

Quellas che tschappan en la lavur

Das dunnas giuvnas en mistregns tipics dad umens

■ **(cp) Ruth Herger e Flavia Schnoz ein ambiziusas e fetg motivadas per lur mistregn. Omisdus absolvan en lur menaschi ed alla Scuola professionala a Glion emprendissadis nunusitai per dunnas – Ruth sco scrinaria e Flavia sco miradura.** Sch'ins savess buc ei, tertgass in plitost che *Flavia Schnoz* absolvi in emprendissadi da commerci ni in sco specialista da hotellaria, pergei ch'ella ei fina da statura. «Ferma? Na, gliez ston ins buc exnum esser per daventar miradura. Sch'ins mo vul, damogn'ins tut», declara ella tut incantada da siu mistregn. Esser ordaviert da tutt'aura, tschappan en la lavur e lu veser la sera tgei ch'ins ha fatg ei per Flavia il pli bi vid siu mistregn.

La voluntad da reussir

Ruth Herger ha gidau da restaurar tier ella a casa ed ha entras quei survegniu grond tschaffen vid la lavur da scrinaria. «Sunter sun jeu ida a fuffergnar ed erel incantada da quei mistregn.» La multifariadad, la lavur vid differentas materialias, mintgatun empau semudergiar e lu puspei la lavur fina vid il lenn, quei plai ad ella. E ch'ella ei la sulletta dunna en sia classa para buca da disturbar ella. «Jeu sun s'endisada culla demananza dils umens», di Ruth cun bucca rienta.

Acceptanza entras prestaziun

Perquei che Flavia ha buc anflau ina plazza ellas vacanzas da stad eis ella sedecidida a cuorta vosta da gidar siu vischin sil baghetg – sco miradura. Era ella ei vegnida tschaffada immediat dalla fascinaziun per quei mistregn. Ella ha astgav fuffergnar in jamna sco miradura ed ei lu

sedecidida per quella professiun. Las duas dunnas lavuran veramein en mistregns nunusitai – ellas secumprovan denton entras fetg bunas prestaziuns. Dad ina posiziun particulara vulan ellas saver nuot; lur finamira ei da reussir en ina domena dad umens, da mussar als umens tgei ch'ellas san.

Miradura ni scrinaria – in mistregn da siemis

Il mistregn da scrinari e miradur lai aviert differentas pusseivladads – quei

confirman las duas dunnas. Suenter igl emprendissadi vulan ellas luvrar sil mistregn e rimnar experienschas. Ruth e Flavia san denton era s'imaginar da secolar vinavon. E las perspectivass sin quels secturs ein vastas – naven dall'architectura interiura sur il menader da construcziun tochen tier ils mistregns tecnics.

Actualmeins visetan 30 miradurs e 40 scrinarias la scolaziun dil fatg e la formaziun generala alla Scuola professionala industrial a Glion.

Per interessentAs dalla secunda e tiarza classa dalla scola reala e secundara, che han gust dad emprender d'enconuscher quels mistregns, organischescha la scola professionala in di d'informaziun. Quel ha liug mesjamna, ils 11 d'avrel 2012 ed entseiva allas 09.00 (mira il program detagliu silla pagina d'internet: www.bzs-surselva.ch)

Annunzias per il di d'informaziun per mail ad admin@bzs-surselva.ch ni telefon a 079 830 85 29.



Ruth Herger absolva igl emprendissadi da scrinaria.

MAD